




# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

OKETOPA 2017

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

## 'Aua Tou Te Lafo a Outou Penina i Luma o Puaa

*saunia e*

### Saaga Kofe

(A'oa'o i'u mai Malua)  
Pepa mai le Mafutaga  
Matagaluega a Apia

Mataio 7:6: "Aua tou te avatu le mea pa'ia i uli, aua fo'i tou te lafo a outou penina i luma o puaa, ne'i latou soli ai i o latou vae, ma liliu mai, i le saeia ai outou."

*(faaauau itulau e 2)*

*O le Mafuaaga o le Pese"*

### Blest Be The Tie That Binds

1 Ioane 2:10: O se alofa i lona uso, o loo tumau ia i le malamalama, e leai foi se mea ia te ia e tausuai ai.

*silasila itulau e 7*



Faletua - Tausala - Tama'ita'i - Tausi - Taupou poo le a lava - o tapenapenaga uma lava a le Mafutaga a Tina mo le Umusaga o le Fale lupeli fou i Malua.

### O Lesona Faigata o le Olaga Talavou

*faaauau itulau e 8*

### LAUGA 'A'AMI:

Laugatogi Tavvaga Tusiga Tala -  
A'oga Mauululuga EFKS.  
*silasila itulau e 9*

# 'Aua Tou Te Lafo a Outou Penina i Luma o Puaa

## Autu o le Folasaga

O se taumafaiga vaivai e ala i le pepa ua saunia, ua manatu le faipepa, se'i o tatou toe asia se tasi o saunoaga tuu sa'o a Iesu e pei ona faamauiina i le Evagelia a Mataio, pei ona ta'ua i luga. O se vaega o saunoaga a Iesu, o loo aofia i totonu o tala tusitusia ua faaulutalaina e nisi, '**O Lauga a Iesu i Luga o le Mauga** (Mataio 5:7; silasila i le Luka 6:17, '**O Lauga a Iesu i le Mea Laugatasi**), O nisi o aoaoga taua a le Alii Faaola, ua ta'imua ai nei le galuega tala'i ua aga atu iai le Alii, faatasi ai ma le lagolagosua a le au soo filifilia e to'asefulu ma le to'alua.

E iai se mafua'aga taua ua manatu ai le fai pepa, e ao ona toe asia le saunoaga tuu sa'o lenei a le Alii o Iesu, ona, a fua lava i upu tuu sa'o o loo faaaogaina e Mataio, e fai lava si ogaoga o manatu o loo afifi ai i totonu - e pei o le faaaogaina o upu 'uli ma puaa', i le gagana faa-faatusa (metaphorical language), e faatusa iai se tagata, poo ni vaega foi o tagata o se sosaiete. O le ala foi lea o le fesiligia e le toatele o le au su'esu'e o le Tusi Paia, le tulaga ese ai o upu ua faaaogaina e Iesu i lea lava aso, e momoli ai le fe'au, e le gata mo lona au soo, ae faapea foi mo le au faalogologo.

O se taumafaiga la i lenei taeao, o se sailiiliga i manatu ma lagona faaalai o nisi o le au su'esu'e o le Tusi Paia e faatatau lava i le uiga loloto o le tusi ua filifilia ma faaaogaina. O le faamoemoe autu lava ma se vaivaiga, atonu o loo ta'oto i totonu o a'oa'oga taua nei a Iesu, nisi o ta'iala e mafai foi ona a'oa'oina ma limata'ita'iina ai le malaga faale-faatuatua a le tagata lotu EFKS i lenei foi senituri, a o

tatou folau pea i le vasa o fita o le Tala Lelei, i totonu o nuu ma afio'aga, aiga, aemaise lava i totonu o aulotu.

## 1. Mataio 7:1-12 ma lona vaeveaina i manatu 'anoa se lua

O upu sii a Mataio i le vaega lenei o lana molimau, o loo faamamafaina ai e le tusitala lona vaeveaina i ni vaega se 2:

i. 7: 1-5 - O loo fofola ai upu tima'i a le Faaola e faatatau i le vaioa o le soona faamasino atu e le isi tagata o le isi ona uso a tagata

ii. 7: 6-12 - O a'oa'oga a Iesu e faatatau i le taua o le alofa atu i le isi uso-a-tua'oi, e pei ona mua'i alofaina ai i ta'ua e le Atua.

E foliga mai la i se vaaiga faa-faigofie, o lea lava ua fofola manino e Iesu i lona au soo, ma le au faalogologo, i le vaega lona lua (ii) ua ta'ua i luga, le taua o le va tua'oi, e fetausia'i ma alofa atu e pei ona mua'i alofa mai o le Atua. Peitai, i le matau a nisi o le au faitau o le Feagaiga Fou, e peiseai e le o gatusa le "tua'oi fetausia'i i le alofa" lea e foliga mai o loo autu iai le vaega lea o le molimau a Mataio 7:6-12, ma le faaaogaina o le upu "uli" ma le upu puaa e faatusa iai se tagata, poo se tua'oi foi o soo se tagata soifua.

A toe faaupu la i le gagana faa-faatusa saunoaga a Iesu, e mafai ona faapea - '*Aua tou te avatu le mea pa'ia i uli (tua'oi); aua foi tou te lafo a outou penina i luma o puaa (tua'oi), ne'i latou soli ai i o latou vae, ma liliu mai, i le saeia ai outou.*'

O le fesili e faaono tulai mai e faapea, "Aisea lava ua saunoa ai faapea le Alii Faaola, ae poo ai tonu lava le "tua'oi" lea e faatatau

iai le upu 'uli' ma le 'puaa' (tulou)?

Ae o se tasi o itu ogaoga e faigata ai lava ona faavasega faale-mafaufau le fetalaiga lea a Iesu, ona, o lea faato'a mae'a lava ona saunoa le Alii i le leaga o le "faamasino atu", (7:1). '*Aua tou te faamasino atu, ina ne'i faamasinoina outou*'. O lona uiga, e foliga mai, o lea ua toe liliu lona finagalo, ma ia aumai tuu sa'o le iuga o lana "faamasinoga" i lona faavasegaina lea o ituaiga tua'oi, o le isi o le "uli" ae o le isi o le "puaa". A tuu mai lava i se faaupuga faafaigofie, o le vaai lea faa-faamasino a le Alii o Iesu i tagata tonu lava ia e faatatau iai ana aoaoga.

Ona iai loa lea o fesili e faatupu manatu, ma o le autu foi lea o se taumafaiga i lenei aso, e faapea: 'E faapefea ona tupu lea mea: E le o le finagalo ea o le Alii, ina ia aofia tagata uma i le faaolataga? E lei saunoa ea foi faapea, 'Ou te le'i sau mo e malolo, na o e mama'i?'

## 2. O Uli ma Puaa i le Lalolagi o le Tusi Paia

O uli ma puaa, o isi ia manu taatele i le tala i le Tusi Paia. O puaa, o manu e le mama e tusa o tu ma aga faa-lutaia, ma o le ala lea o le faasaina i tulafono faa-Teuteronomie ona faaaoga i mea taumafa, poo le faaaogaina foi e osi ai taulaga i luma o le Atua (Levitiko 11:7, Teuteronomie 14:8, Isaia 66:3)

Peitai o le manu lea o le uli, e tele ni vaega o loo faamatala ma faaaogaina ai i totonu o le Tusi Paia, e pei la o vaega nei:

i. E masani lava ona faaaogaina i lona itu e le manuia pe le talafeagai foi, e pei la o lona faaaogaina i le 1 Tupu 14:11: "O so sa Ierepoamo e oti i le aai, e 'aina lea e uli...." ma le 16:4: 'O so sa Paasa e oti i le aai, e 'aina lea e uli...." O lona uiga, o le uli, o se manu e iai lona itu e faale-manuia.

*faaaauu itulau e 4*

# O LE LAUGA

O le lauga i le suafa mamalu o le Atua le Tama, le Alo ma le Agaga Paia... Amene...

Tusi Faitau: Mareko 5: 9-17  
Matua: Mareko 5: 17

**Ona latou aioi atu lea ia te ia ina ia malii ese atu ia i lo latou nuu.**

**Manatu Autu: Ia ama i le gau ae matau i le tau.....**

O soo se tagata soifua e mafaufau e fai se pisinisi poo se isi lava atinae, o lona fa'amoemoe maualuga lava, ia maua se faasiligia aua le manuia alualu i luma o aiga, o nuu ma ekalesia. Ae afai e tele atu tupe faaalu i tupe maua ma tele le taimi ma le malosi e faaalaina ae leai se faasiliga poo se mea aoga o maua ai: o lona uiga ua gau. Mo i latou la e ana pisinisi ma atinae, o le gau o le pisinisi o se matua avega mamafa i le mafaufau. E lagona le le fiafia ma tuufesilisili le mafaufau pe aisea, aua o lea ua gau le pisinisi, o lona uiga ua leai se fa'amoemoe o totoe.

O le taimi lava na logo ai le tala e uiga i le vavega na faia e Iesu i le tagata sa uluitinoina e temoni, fai mai Mareko, na faafuasei lava ona fetuleni ane le motu o tagata e toatele e fia iloa le moni o lea tala. O le motu o tagata e pei ona taua, e aofia ai i latou na omai e matamata ma fia iloa le moni o le tala ua avatu, faatasi ai ma i latou e ana puua poo le pule o le lafu puua. Ao i latou ia na taufetuli e ta'u le tala o fafaga puua. O loo i ai i nisi o faamaumauga, o tagata faigaluega tagata ia. Pau le latou galuega o le fafaga o puua. O loo faavae lenei finauga i luga o le talitonuga faa-Iutaia, o le fafagaina o puua, o galuega e tatau ma patino i auauna poo tagata faigaluega. A o i latou e pule i le lafu puua lea

faatoa oo mai, e fia iloa le mea ua tupu.

E lua ni mafuaaga na mafua ai ona taufetuli le au alii ia e tau i le nuu le vavega ua faia e Iesu: Muamua:

O le ofoofogia o le vavega ua faia. E le o taua pe fia tausaga, ae fia ni aso na uluitinoina ai lenei uso e temoni. Ae afai ua faaigoa o le Lekeona, o lona uiga, e le faigofie lona gasegase. A o le mea ofoofogia lea e tupu ii, o le usitai o temoni ia Iesu.

Lona lua:

O le fefe ma le popole i fesiligia poo fea puua. O le va fesootai o auauna poo tagata faigaluega ma o latou matai i le tu faa-Iutaia e fai a sina ogaoga, pe a oo ina le fiafia le matai. E oo ai le oti. O le faavae lea o manatu, o le tasi lea mafuaaga na naunau ai le au fafaga puua e ta'u le tala. I le talitonuga, pau lea o le auala e faamaonia se latou tala, ma laveaiina i latou ona o puua ua toesea. Lea la ua fetuleni mai i latou ia. Ua latou molimau foi, e sa'o ma faamaoni le tala na avatu. O le tagata ua leva ona saisaitia ma pulea e temoni, lea e faaigoaina o le Lekeono ua maloloina ma saoloto ia Iesu. Ae a fesili la pe faapefea ona faia le vavega, ona tali lea i le mea lea faamatala mai i le fuaiupu 7-13. *“na tuli e Iesu temoni i le suafa o le Atua, ae aioi ane temoni e tutuli latou i puua, ona uluitino lea o temoni i puua, ona feosofi ifo lea o le lafu i le tofç i le vai, pe atoa le lua o afe i latou, ona malelemo ai lea i le vai”*

E le o taua ni foliga vaaia o tagata ia e faalogologo i le tala, aemaise o tagata e pulea puua. A o le fuaiupu ua fai nei ma matua, o loo faaleoina lagona o le le fiafia ma lagona o le fefe na lofia ai nei tagata, ona o le mea na faia e Iesu. *“Ona latou aioi atu lea ia te ia ina*

*ia malii ese atu ia i lo latou nuu”*. O le upu aioi e uiga tutusa ma le faatauanau mamate. Ua uma le faatauanau, ae ua matua faatauanau e alu ese. I se isi upu lata mai, ua latou tuli Iesu. O le faailoga manino lea, o le inosia o Iesu e ia tagata. A o le fesili aisea ua le fiafia ai nei tagata? Sa manatu lava e fiafia ma olioli aua o lea ua faasaolotoina lo latou uso poo le tuagane na uluitinoina e temoni. Peitai, ua le faapena le manatu o tagata.

E lua mafuaaga o loo mafuli i ai suesuega a le au Suesue o le Tusi Paia, na mafua ai ona faatauanau e tagata Iesu e alu ese ma lo latou nuu:

1. O le fefe ma le popole. Ua fefefe ma popole tagata i mea ane ua le gata ai i puua le faamaumau a Iesu, ae faasoloatoa ai ma nisi o a latou atinae.

2. O i latou ia ua taumafai malosi e tuli ese Iesu, o tagata e ana lafu puua. Ua faaleo lo latou le fiafia faa-tagata fai pisinisi ia Iesu. I lo latou manatu, ua matua gau lava lo latou taumafai e tausi ma faapelepele puua mo se faasiliga e maua mai ai. Afai e fai se aufaigaluega, ua atili ai ona gau, aua ua gau atu ai ma tupe na totogi ai le au faigaluega. O ai na iloa e faatau meaa e tausi ai puua ma isi lava faatinoga mo le manuia o le atinae? Ae ua a nei, ua feosofi uma i le tofe, ua malelemo. O le aofaiga o puua e pei ona taua, e lua o afe (2,000). Oka, e le itiiti le malosi na tausi ai nei puua e tele, a o lea ua leai ma se mea o totoe. Ai e feololo pe ana faapea e malelemo se vaega, ae totoe se isi vaega. A o le tala a Mareko, leai ma se mea o totoe. O ai la se isi o le a le fiafia? O ai se tagata e tautiga e tausi ni puua se 2,000 ae mulimuli ane ua toesea i se auala e lei mafaufauina. Afai o puua o le auala lea o loo maua ai le tamaoiga e ola ai le aiga ma faatino ai isi mea fai i le nuu ma le ekalesia, o lona uiga, ua le aoga uma

*faaauau itulau e 4*

# O LE LAUGA

*mai le itulau e 3*

a ia mea.

Ao le a se finagalo o Iesu? Faamata ua agaleaga le Alii ma le amanaia le tautiga o nei tagata? Le Ekalesia ma le au faatuatua, e manatu le lauga, e leai. E le faapea ua agaleaga le Alii, pe ua taufaaleaogaina foi e Iesu le taumafai o nei tagata e atiae o latou aiga ma pisinisi. E manatu le lauga, ua faasili ia Iesu le ola o le tagata ua toetiiti a fano i le temoni ae faatuatuanai le malosi na alu i le tausiga o le lafu puaa. O le mea moni, e silafia lelei e Iesu le taunu'uga o le mea lea ua fai, ae fai lava, ona o lana lea fa'amuamua, o le ola o le tagata. Afai foi ua maumau ona o le finagalo o Iesu e faola le uso o le a tāli oti, e mautinoa lava e toe faafoi mai lava e Ia nisi manuia e sui ai le faamaumau ona o Ia ma lana galuega.

Fai mai le manatu autu, **Ia ama i le**

**gau ae matau i le tau.** Ia aua nei manatu mamafa i le gau, ae ia tulimatai ma faamamafa lona tau. O le feau lea a Iesu mo i latou e ana puaa, Ia ama i le gau ae ia matau i le tau. Ia faamama le manatu mamafa i le gau, ona o puaa ua malelemo, ae ia faataua ma faamamafa le ola ua toe faasaoina. O se feau foi lea mo i tatou le Ekalesia. Ua faafia na e folafola lou gau ona o le Atua ma lana galuega? Ua faafia na e tuuaina le Atua ona o le gau o lou malosi, ua gau lau pisinisi, ona o mea fai a le Lotu? Ua faamanatu lenei lauga, Ia ama la tatou vaai i mea ua foai. O le upu moni tatou te le o gau. O le tatou lea vaai faaletagata, ua maumau le malosi, ua alu atu foi le fia i mea fai o lenei Aso Sa, o faiga taulaga, o faa-mati, o le Fale Iupeli ma isi mea faalelotu. Peitai, tatou te le o gau. Le au uso e, tatou te le o gau. Ua uma ona fetalai lo tatou Alii,

“e le pau fua lou afu ona o Ia ma lana galuega” E i ai le tau o au galuega uma mo le Atua. Ua fetalai foi Iesu, “o le faamaumau lona ola ona o Ia, e toe maua, a o le faamaumau lona ola ona o ia lava, e le toe maua”.

Le Ekalesia e, ia matau i le tau. Ia taulai lau silasila ma la'u vaai, i le faaolataga na saunia ma tapenaina e Iesu. O le tau e le faamatalatalaina lona aofai. Ae afai e manatu ane o tatou ua gau, o le faamalosi le au uso e, tatou onosai ma faamalolosi. O le Atua i lona alofa tunoa na matua gau aano ai ona o i tatou ma le lalolagi. Na tuua lona mamalu, ae afio mai ua tatou militino faatasi. O tatou e fesiligia le gau ma le le gau. A o le Atua na matua gau aano, ae leai ma se tala. Ua na o le faamanuia ma faapea: **Ua fai lenei mo outou.** Aisea la tatou te mumusu ma augatata ai e faamaumau mo Iesu? Ona o Iesu Amene. ...

Saunia: Enoka Ofisa (A. K)

Ofisa A'oa'oga Kerisiano

## Aua Tou Te Lafo a Outou Penina i Luma o Puaa

*mai le itulau e 2*

ii. Afai foi e finagalo se tagata e faifai i le isi uso a tagata, ona faaaoga lea o le upu uli' (1 Samuelu 17:43: Ua fai mai le Filisitua ia Tavita, ou te se uli ea a'u, ina ua e sau ia te au ma tootoo.....?)

iii. Afai e te ta'uina se isi tagata o se uli mate, o lou ta'u faatauvaaina lava lea o le isi uso a tuaoi (2 Samuelu 9:8: 'Ona ifo lea o ia ma fai mai, O ai ea lau auuuna, ina ua e silasila i le uli mate, e pei o a'u nei?) ma le 2 Samuelu 16:9: 'Ona fai mai lea o Apisai le tama a Seruia i le tupu: 'O le a le mea e fetuu mai ai lena uli mate i lo'u alii le tupu?)

iv. I le vaai foi a le fai Salamo, e mafai foi ona ta'ua se tagata o loo ita mai ia te oe, o se uli (Salamo

22:16, 20 - aua ua siosiomia a'u e uli, ua punitia a'u e le vao o tagata leaga....ia laveaiina au ua toatasi mai le lima o le uli.

v. O e foi e ese a latou tapuaiga ma talitonuga, ua faatusa foi i uli (ma puaa) e pei ona talanoa iai 2 Peteru 2:22: 'A ua taunuu ia te i latou le upu faa-faata'oto moni; ua toe fo'i le uli i lona pua'iga, i le ma lea, O le puaa na faata'eleina ua toe foi o ia e taafili i le palapala.

vi. O le feiloaiga foi a Iesu ma le fafine Kanana, (Mataio 15:26) na saunoa ai foi le Alii e faapea: 'Ona tali atu ai lea o ia, 'E le tataua ona ave le mea e 'ai a le fanau, ma lafo i uli.'

I le vaai foi a le au Rapi poo faiaoga o le lotu Iutaia, o tagata o nuu ese, (gentiles) e i fafo atu o le li'o o tagata Iutua, faatasi ma i latou o e latou te le talia aoaoga a le lotu Iutaia, o tagata ia e ta'ua o uli. E manatu nisi, o le ala lea o le faaaogaina e Iesu o le upu uli

i le Mataio 15:26 e pei ona ta'ua i luga, aua o le fafine o nuu ese (Kanana) lea la te fesaga'i.

Ae fai mai foi le molimau a se tasi o tagata suesue iloga o le Tusi Paia e suafa ia S.T .Lachs e faapea, 'Soo se taimi lava e faaaoga ai e tusitala o le Feagaiga Fou le upu uli o loo manino lava le vaega o le sosaiete lena e faataua iai, o tagata Samaria! I le ma lea, e manatu foi Lachs, o puaa ia e taua i nisi o tusitusiga a le au fai evagelia, e peiseai o loo faataua tonu lava i le puleaga a le malo o Roma, lea o loo ia puleaina Palesitina i ia vaitau.

I lona aotelega, o lea lava la ua manino mai, o uli ia e talanoa iai Mataio, o loo faataua lava i se tagata, poo se vaega foi o tagata o le sosaiete, aemaise lava i tagata ese (gentiles, ae le o tagata uma foi?); poo i latou o loo i fafo atu o le li'o o le lotu Iutaia. O puaa, ua faatusa iai le malo o Roma, aemaise lava i lo latou sauaina o tagata Kerisiano i ia vaitau.

**3. O mea "Paia" ma "Penina" ua vaioa e Iesu ona lafo i Uli ma Puaa**

*faaaauu itulau e 12*

*John Knox - 1514-1572*

# IOANE NOKISE

**“O Le na Ta’ita’i ma le Pelu”**

**Le Atua e, aumai mo a’u Sikotilani, a lei e sili ona ou oti!**

## O le Porotesano ma lana Pelu

O le ogatotonu o vai tausaga 1540 ma mulimuli ane ai, na malii ai le na tofia e fai ma sui o le tupu teineitiiti na te faatinoina galuega ona e le’i taitai ona mafai ona fai e le tupu ua tofia, o Maria (Mary, Queen of Scots), lea na soloa’i ane i le nofoalii ae na o le tasi le vaiaso lona matua.

Ona tofia ai lea o Maria (Mary of Guise) e fai ma sui i lana tama lea ua tupu. A o Maria lenei, e matua Katoliko a’ia’i. Na ia faatuina ni faiga e soloia ai faiga faavae faa-Porotesano lea na faatuina e le na fai ma sui o le tupu teineitiiti. O le vai taimi foi lea na sosolo ai faiga tau faafefe i Sikotilani faasaga i tagata e tetee i faiga faa-Katoliko

A o le vai taimi foi lea na tula’i mai ai i le talafaasolopito se fai evagelia logologoa Porotesano, o Siaso Uisati (George Wishart. E le’i fefe le tagata lenei i taufaafefega sa fai e le lotu Katoliko sa fai aga’i i tagata Porotesano. Sa malosi lona femalaga’i i Sikotilani, ma ia laugaina le Toe Fuata’iga o le Ekalesia i tagata uma sa faalogologo ia te ia. Na faalogo Siaso Nokise i tala i lauga a Siaso Uisati, ona alu ai lea e faalogologo iai. Ma e na matua faagaetia lava lagona o Nokise i mea na laugaina e Uisati. E le’i umi, ae faapoopo atu Nokise i le vaega a Uisati, ae le ina ia avea o ia ma fai-evagelia pei o Uisati. O le mea na oo iai, ua tofia Nokise e fai ma leoleo e

puipuia le soifua o Uisati. Ua tuuina atu foi ia te ia se pelu e faatauma’ai ona itu e lua. O lea pelu na ia sulu i lona itu taumatau ma fealua’i ma ia i taimi uma.

E mafai lava ona tatou vaavaai i se ata faalemafaufau o Nokise o tu i tafatafa o Uisati ma lana pelu, piilima, ma faasolo lana vaai i le motu o tagata, ma matau ni tagata faatupu faalavelave e ono osofa’ia Uisati.

### **Maliu Uisati ae le o iai Nokise**

E lima vaiaso o taumulimuli lava Nokise ia Uisati ma faatino ona tiute faaleoleo mo Uisati. Na oo ina matua vavalalata lava le la mafutaga, o se uo, tagata faatuatuaina, ma se tagata a’oga. E ui lava na manao Nokise e nofo pea ia Uisati, ae sa u’una’i pea e Uisati, “toe fo’i i au tama a’oga. Ua lava le to’atasi e faia le taulaga ola.”

Ma o le taimi e le o iai Nokise na te leoleoina Uisati, na faatonuina ai e le Katinale pi’opi’o o Tavita Pitone (David Beaton), le pu’eina o Uisati. Na fai le faamasinoga o le fai evagelia, ma tuua’ia ai faapea o lona laugaina o mea sese. O le aso muamua o Mati i le tausaga e 1546 na ta’ita’ina atu ai i le fata e susunu ai se’ia oti. A manatunatu atu i ai, e le taumate lava e le oo ia mea ia Uisati pe ana iai Nokise, ona o Nokise foi e malosi le lagolagoina e isi foi tagata.

Ae le’i alu filemu Uisati. Na

saisai ona lima i ona tua, ma le maea i lona ua, ma le fusipa’u u’amea i lona puimanava, ae lauga mai lava i le motu o tagata o potopoto. Na ia faamalosi i tagata ina ia latou tutumau i le Upu Moni a le Atua, ma faaauau ona latou faia o mea sa ia laugaina. Na ia faamanatu foi ia i latou, na te le’i laugaina pe a’oa’o ni talitonuga o tagata poo ni tala faafagogo, a o le Upu Moni ia Keriso. Na ia faalototele ia i latou, ma fai atu, e ui lava o le a oo ia te ia ni tiga ogaoga o le tino, ae le umi ae tootuli o ia i luma o ‘a’ao o Iesu, ma faatasi ma ia e faavavau.

O lana saunoaga mulimuli na matua oo ifo i lagona o tagata, e pei o le tagata lea ua na saunia o ia mo lona faasalaga, lea ua tootuli ifo nei i ona vae, ma talosaga ina ia faamagaloina o ia mai le mea lea o le a ia faia ia te ia. Na faamagalalo e Uisati ma sogi atu i lona alafau, fai iai e faataunuu loa lona tiute. Ona saisai ai lea e le faaoo sala ia Uisati, nonoa le maea i le fusipa’u u’amea o fusi i lona sulugatiti, ma faatautau ia te ia i luga o le afi mumu. A o mu o ia i le afi, sa ia alaga ina ia faamagaloina i latou o faia lona faasalaga.

Ua amata alalaga nei tagata ina ia tau i ma sui atu ia i latou ua faasalaina Uisati. Na avea lea vevesi ma mea e faatupuina ai le ita ma le faanoanoa i le loto o Nokise. O Nokise o se tagata e faatino mea e talitonu iai. O le mafuaaga lea na ia auai i le tetee tele ua tulai mai nei.

O le katinale faasausili o Pitone (Beaton) ua amata lamatia nei lona ola e tagata tetee, ae na o le ‘ata’ata pei na te le amana’ia le fou ua tulai mai. Ua atili lava ona o le masiofo lea o fai ma sui o lana tama teine laitiiti lea e tupu, e talitonu le toatele o tagata, o se talitane a le katinale (mistress), ma o le katinale foi o loo puipui maluina e Sikotilani. Sa lafi foi o ia i se fale,

*faaauau itulau e 6*

# A'oa'oga Maua Mai le Soifua o isi Kerisiano

*O le Mafuaaga o le Pese"*

## Blest Be The Tie That Binds

I Ioane 2:10: O se alofa i lona uso, o loo tumau ia i le malamalama, e leai foi se mea ia te ia e tausuai ai.

"E le mafai ia i ma'ua ma lo'u toalua ona motusia le mafutaga mafana sa tatou faia ma outou a ma uo i ia tausaga e tele ua mavae." O le faaaliga lea a Maria (Mary Fawcett) i le tama'i aulotu i Wainsgate i Egelani e uiga i le alofa sa la maua mai se aulotu toaitiiti ma le matitiva. O le

mafanafana o lea mafutaga na mafua ai ona tusi o se solo (poem) e le alii faifeau o Ioane Fawcett, le to'alua o Maria, e faaali ai ona lagona e uiga i mafutaga faa-uso-a-Kerisino.

O le Aso Sa na sosoo ai, na lauga ai Ioane i le mataupu mai le Luka 12:15: "Ua fetalai atu foi o ia ia te'i latou, 'Ia outou ia leoleo outou ia te outou aua le matape'ape'a, aua e le ola se tasi i le tele o ana mea ua ia te ia.' Na faai'u

lana lauga i lona faitauina lea o lana solo na tusi: Brotherly Love (Le Alofa faa-Uso)

Faato'a 26 tausaga o le alii faifeau o Ioane Fawcett, faato'a faaipoipo fo'i ma lona to'alua talavou ma le aulelei o Maria, ae amata ona la galulue i le aulotu lea matitiva ma le to'aitiiti i Wainsgate. E fitu tausaga talu ona galulue ai i Wainsgate, ma mafatia ai lava ona o le matitiva o le 'aulotu, ae valaauina i la'ua i se aulotu matua toatele lava ma le maumea i le aai tele o Lonetona.

Ua oo i le aso e faamavae ai ma le la aulotu to'aitiiti i Wainsgate; ua mae'a ona uta i taavale solofanua a la meafale, ona faasolo ai lea ona faamavae Ioane ma Maria ma le la aulotu, o loo fetagisi mai, ma la fetagisi atu foi la'ua.

*faaaauau itulau e 7*

*John Knox - 1514-1572*

## IOANE NOKISE

**"O Le na Ta'ita'i ma le Pelu"**

**Le Atua e, aumai mo a'u Sikotilani, a leai e sili ona ou oti!**

*mai le itulau e 5*

o se 'olo, e loka mauina ma saogalemu ai. Fai mai a ia, "O ai ou te fefe ai?" o lana tala lea a o talimalo i le atalii o le kovana i se isi afiafi. Ma gugutu ai lava e uiga i le isi fafine lea o le a la tafafao i le afiafi lava lea.

**Matou te o mai mai le Atua e tauti atu ma sui i lau mea na fai**

Te'a masina e lua, i se taeao puaoa a o le'i tafa ata, na lalafi ai ni tamaloloa faaa'upegaina i se faapuloulou ma faatalitali se'i alu le fafine talitane lea ei totonu o le potu o le fale ma le faifeau. Na savali atu se isi o tamaloloa nei ma faafeiloa'i i le tamaloa tiute, ma fesili pe ua ala le faifeau o Pitone. Na masalosalo le tagata tiute ma amata ona tago e se'i a'e i luga lana pelu, tutu'i loa e le

tamaloa i lana foi pelu, faalua, faatolu, faafa. Na togi ifo i lalo i le vai le leoleo ina ua oti. Ona tamomo'e atu ai lea o tamaloloa i le faasitepu ma oo atu i le faitoto'a o le faifeau o Pitone. Na tu'itu'i atu i le faitoto'a, ala ai Pitone ma valaau i ana leoleo e la'u ane ni pusa mamafa e taofi ai le faitoto'a ne'i matala. Ae na talepe e tagata tetee le faitoto'a ma oo atu ia Pitone. Na pa'u i tua le faifeau i lona nofoa ma fai mai ma le fefe, "O a'u o le patele! O a'u o le katinale! Tou te le fasiotia le patele!"

E le'i mafai ona tetee e upu a le patele le ma'ema'ea o tagata. Ua atili oso a'e ai lo latou ita i lona ta'u mai o ia o le katinale. Na alu atu le ta'ita'i o le 'au tetee ua se'i lana pelu ma tuu lona mata i le mavana o Pitone ma fai iai, "Salamo mai au agasala, aemaise

lava i le toto ua masaa o le avefe'au a le Atua, o Siaoisi Uisati. Ua matou o mai, o matou o avefe'au a le Atua, e tauti atu ma sui i le mea na outou faia ia Uisati. E le o so matou manana'o i au auro e tele, poo so matou fefefe i au faiga saua. Ae o lo matou le taliaina o ou talitonuga e tetee ai ia Iesu le Faaola.

E le'i salamo lava Pitone. Ona tago ai lea o le faaoosala i lana pelu, ma sunu'i faatolu i le tino o Pitone, a o alaga mai, "O au o le faifeau! O a'u o le faifeau!"

Ona faaaauau ai lava lea o le faasalaga o Pitone e tamaloloa 'ofu pulupulu. Na latou nonoa foi se maea i lona ua, ma faatautau ifo ai i le faamalama o le 'olo se'i vaavaai iai le toatele o tagata o le nuu.

O luga tonu a'e o le mea na faafalepui ai, ma sauaina ai Uisati i nai masina ua te'a, na faaoo ai e tagata tetee ofu pulupulu le oti ia katinale Pitone.

mai le tusi: "God's Generals"

tusia e Roberts Liardon

faamatalaina e

Afemata T. Apelu Aiavao

(faaaauau i le Sulu o Novema)

# A'oa'oga Maua Mai le Soifua o isi Kerisiano

*O le Mafuaaga o le Pese"*

## Blest Be The Tie That Binds

*mai le itulau e 6*

Fai mai Maria i lona to'alua, "Ioane, e le mafai ona ta o a o fetagisi mai faapea le aulotu! Ou te le iloa pe faapefea ona ou alu."

Ae tali le alii faifeau o Ioane i lona to'alua, "Faapena fo'i a'u, Maria. Ou te le iloa pe faapefea ona ta faia lenei mea. Ta toe nonofo ia, ma faaauau ona ta galulue faatasi ma latou, ma ta onosa'ia lo latou matitiva."

Ona toe la'u ai lea i lalo le uta a le taavale solofanua.

Ona faaauau ai lea o le galuega a Ioane ma Maria i Waingate, se'ia oo ina atoa le 54 o tausaga o le la galuega. Fai mai na o le \$200 i le tausaga le la tupe na maua, e ui lava ina tuputupua'e pea le lauiloa o Ioane Fawcett i ana lauga tala'i i Lonetona ma isi aai o Peretania,

atoa ma ni tusi na ia tusia, e aofia ai ma le tala: 'Anger', lea na avea ma tala e matua fialia iai le tupu o King George III. Fai mai na

## Blest Be The Tie That Binds

Blest be the tie that binds our hearts in Christian love!  
The fellowship of kindred minds is like to that above.

Before our Father's throne we pour our ardent  
prayers; our fears, our hopes, our aims are one, our  
comforts and our cares.

We share our mutual woes, our mutual burdens bear;  
and often for each other flows the sympathizing tear.

When we asunder part it gives us inward pain;  
but we still be joined in heart, and hope to meet again.

## "Ua ou misia lava oe!"

Ua tele tausaga o matou nonofo iinei ua ou le manatua le aso na matou o mai ai i le mea lenei. A o o'u tu i le faitoto'a ma autago la'u 'ato e su'e mai le ki o lo'u potu, ae ou faalogoina le manogi masani o le fanua, manogi o laau ma o latou fua felanulanua'i. O manogi masani e pei o latou talia lo'u fo'i mai. O le aso i le a'oga, o mea masani lava, pei o la'u mataupu o le history e le'i lelei. O le mataupu lea e sili ona ou vaivai ai.

O le po nei ou te alu ai matou te fai 'aiga ma nisi o a'u uo, ae ua fai lava sina putuputu o le tele o mea e tatau ona fai. Tau tiga mai fo'i ma lo'u ulu. Toe oso mai ma lo'u lelava. Ua mamafa mai le mau

mea e tatau ona fai. Na tuu atu le ki i le 'au o le faitoto'a, ae te'i ua tatala mai.

Manaia lona 'ofu o loo fai. O lona laulu e uumi e tau ifo i ona suilapalapa. E tele ina ita pe a ou tago atu i le faapatu i luga lona laulu. O le tautalatala ia e pei o se tagata ua matua. E mata fialia lava ma 'ata'ata. O le mea lea e sili ona ou matauina - o lana 'ata'ata. Ma tafitititi fialia.

Ua valaau nei i totonu o le fale, "O Kaka! Ua sau Kaka!"

O le igoa lava lea na te faaigoa ai a'u talu ona amata ona tautala. Ua na le toe faaaogaina igoa "pepe" pei o Kiki, Tata, ma Nini, sa ia valaau ai isi o le matou aiga, poo ana uo, ae tumau lava lona valaau a'u i lana igoa lea, o Kaka! Ona fai mai a ia o a'u lona tei e sili ona fialia iai, ma o le igoa lea e sili ona fialia iai na te faaigoa ai a'u. E ui lava ou te iloa e le malamalama lelei i mea ia e talitonu iai, aua e na o le fa ona tausaga.

folafola e le tupu ni faamanuiaga na te faia mo Ioane. A o le tali a Ioane, "Ua tele tausaga o o'u ola faatasi ma o'u tagata, ma alofagia ai ma'ua. Ua faamanuiaina foi le ma galuega e le Atua. Ae ou te faafetai tele i lau Afioga le tupu ma mea ua e folafola mai mo ma'ua."

Ma, o le faifeau o Ioane Fawcett na tatou maua mai ai le pese lenei o tusia atu i lalo i le gagana Peretania, o se pese e fialia tele iai le 'au Kerisiano i le lalolagi atoa, ma e tele lava ina usuina i ni faamavaega.

Na fusi mau a'u a o o'u seluselua i o'u tamatama'i lima ona laulu ma milimili lona ulu. O lea lava ou te valaau lo'u tei lea o 'baby', vagana taimi ou te ita ai iai ona ou faaaogaina lea o lona igoa moni. E ui lava foi ua le toe 'baby', ae fialia lava i lo'u faaaogaina o lona igoa lea, ae le fia 'big girl'.

Na 'a'apa a'e i luga ma kisi mai i lo'u alafau, ma musumusu mai i se leo, ai e faapea leo o agelu, "Ua ou misia oe!" O ni upu matua suamalie i la'u faalogo! A o le laitiiti ia o le mosimosi lea e tautala maia!

Pei lava na fofu'e atu e se isi lo'u lelava, ma le niniva o lo'u ulu, ma lo'u faanoanoa ma le fesoua'i o lo'u mafaufau.

E matua mata'utia le 'oo'o ifo o le suamalie o upu a le teineitiiti i lo'u tagata fesoua'ina i faafitauli o le olaga talavou: "Ua ou misia lava oe!" ua pei o se vai fofu i o'u faafitauli ma o'u vaivaiga



# ITULAU MO TUPULAGA TALAVOU

## O Lesona Faigata o le Olaga Talavou

*mai le itulau muamua*

O le tausaga e 1984 i le masina o Aokuso, i le a'oga lea ua ou a'e iai. Na matua vevela lava le aso ona e le o 'auaoa le susulu a le la. O lo'u aso muamua foi lea i le kolisi. Ou te le masani i nisi tama ma teine a'oga, aua e tele lava ina mamao le mea e matou te o mai uma ai, i le pasi a le a'oga. Ae le gata i lea, o lo'u aso muamua..

Na ou fia talanoa lava i se isi, aemaise se teine, ia te'a ai lo'u faafefefefe i lo'u aso muamua.

Ae te'i ua ma fetai ma Saipisa. Oka! Oka! Matua aulelei lava Saipisa. Le ituaiga lalelei lea e le mafai ona e le liliu ai ma e toe fia vaai iai pe a te'a atu lana savali ma oe, ma e faalogo atu ai i lou moa e pei o taufetu'i mai. Ma nei lava ofu e pei e le manatu mamafa iai. Pei na te le amana'ia lona lalelei. E le pautaina ona alafau, e le valiina foi ona laugutu. Ae ua atili aulelei ai lava. E aliali mai le isi ona tuli i le masae o lona ofuvae kaki o loo ofuina. Pei e fia teine 'autu, pei e taufa'alili!

Na ma o faatasi i le lifi o le fale e nonofo tumau ai tamaiti a'oga, na 'ata mai ia te a'u, ona ou 'ata'ata fo'i lea iai. Na tu le lifi o'u oso i fafo, ae oso atu foi i fafo i le fogafale lea ou te nofo ai, liliu ma savali i le isi itu o le poletito, ae ou savali atu i le potu o pito mai ma momono iai la'u ki, ae toe liliu ma savali mai i le itu o o'u iai. Na ou fai lea iai, "Ou te le o faatalitali ia oe." Ae lafo mai le upu ma ona mata ita, "O ai na fai atu ia oe o

lea ou se sau ia oe? Ou te le mana'o ia oe." Ma momono atu lana ki i le loka o le potu lea ua tu ai, tatala ma alu i totonu.

Oi se mala paga! Le teine aupito aulelei ua ou vaai iai, i lo'u aso muamua i le kolisi, ua na o le puipui o le potu lea ua ma va ai nei!

Na oo ina ma feiloai, oo foi ina ma tafafao. E oo atu i le masina o Novema, ua matua mafana la ma faigauo. Ta'ilo ia Saipisa, a o a'u, o la'u uo muamua lea, ma o le taimi muamua foi lea ua ou matua alofa ai i se teine. E tasi ma le 'afa tausaga o ma feoa'i ma tele ina fai faatasi a ma mea a'oga i taimi o su'esu'ega a le tagata ia.

Na oo ina oo ia te a'u le fua, pe a talanoa se isi ia Saipisa. Na fai lea ma mea na amata faaletonu ai la ma faigauo. Ma o le masina o Fepuari i le tausaga e 1986, na uma ai le ma faigauo. O le faalavelave, ua ou tuua le avanoa i o'u uiga fua, e talepeina la ma faigauo ma le teine muamua ua ou fai uo iai. Ua ou fia pule i le teine ae le tuu pea e sa'oloto ia ae 'aua ou te saisaina lona alofa.

O le taimi mulimuli lava na ou vaai ai ia Saipisa, na matua tumu ai lo'u loto i le fua ma le ita. O lo'u ita na ou tago ai ua tuu iai le teutusi lapo'a o tumu i ni ona ata, ua uma ona ou tasaeia, 'oti'oti ma faaleaga. O ia ata uma o ata o taimi o le fiafia o le ma faigauo. O le upu mulimuli lava na ia lafo mai ia te a'u: "E te faavalevatea!" Na ou talitonu e sa'o lana upu na fai mai ia te a'u. E le mafai ona galo

ia te a'u la'u tala na fai iai ae ma te le'i fefulituaa'i: Na ou vaai toto'a atu iai, i ona mata, e aunoa ma so'u alofa a o le ita: "Ou te le popole pe ou te toe vaai ia te oe pe leai." Ma ou savali ese atu ma Saipisa. A ua tagi. A ua leai ma so'u alofa iai.

O le tausaga muamua o le malepega o le ma faigauo, ua alu foi lo'u mafaufau i isi mea. Ua suia foi o'u lagona ita ma le fua ia Saipisa, i lo'u salamo i a'u upu mulimuli na fai iai ina o le a ma tete'a. Ua ou matua faanoanoa ai lava. Ma ou misia fo'i Saipisa!

Ua ou matua mana'o nei ou te toe feiloai iai, ma ou faato'ese iai, ma ou fai iai e le sa'o a'u upu na fai atu ia te ia. Na ou fia fai iai e sa'o ia. Na ou fia fai iai, ou te matua alofa moni lava ia ia, ma ua ou matua misia lava ia, ma ua ou toe salamo i a'u upu na lafo.

O le masina o Tesema o le tausaga muamua o le ma tete'aga, vai taimi o aso fiafia o le Kerisimasi ma le faasolo atu i le Tausaga Fou, na ou tago atu ai i le telefoni, ma vili. E leai se tali. Faatalitali laitiiti, toe vili. E leai se tali. Ua osoo tetele lo'u toe fia vaai ia Saipisa. Faatalitali teisi, toe vili. E leai lava se tali. Pei a ou faavalevatea. Ua ou toe manatua nei la'u upu na fai iai: "Ou te le popole pe ou te toe vaai ia te oe pe leai!"

E lua vaiaso talu ona ou telefoni iai ae leai se tali, na ou maua ai le tala, o le teine muamua lava na ou alu iai, ma ou alofa moni iai, ua oti. Na oti tonu lava i le aso lea na ou taumafai ai ou te talanoa iai i le telefoni ma ou faato'ese iai i o'u uiga leaga na faaalua ia te ia. Na lavea ma oti ai i se taavale na 'aveina e se tamaloa ona. Ua oti ae ou te le'i faato'ese iai. Oti ae le'i taunuu lo ma alofa i mea sa ma moomoo iai. Ona o lo'u fua ma lo'u itaita gofie.

mai le tusi: Chicken Soup for the Teenage Soul III, tusia e Rick Reed, faamatalaina e Afemata T. Apelu Aiavao

---

**Jesus gave her water that was not in the well: She went away singing, And came back bringing, others for the water that was not in the well.**

---



# ITULAU MO TUPULAGA TALAVOU

## LAUGA 'A'AMI:

### Laugatogi Tavvaga Tusiga Tala - A'oga Mauululuga EFKS

*saunia e*

#### Afemata Tunumafono Apelu Aiavao

Na tuu mai e le Ofisa o le Faatonu Sili o A'oga a le tatou Ekalesia, se avanoa e fai ai sa'u tautalaga i le tou aso leni, se upu e aoga mo outou ma le tusiga o a outou tala, *short story writing*, poo le *essay writing*. O le mea lea, o le a ou ta'utino atu ai i le amataga lava o la'u tautalaga le mea moni leni: 'A 'e le fiafia i le *short story writing*, poo le *essay writing*, e le mafai e sa'u upu ona faaleleia sou taumafai. Se'ilogaga e te mana'o iai, ma e nofo i lalo ma tusi se tala. Ma fai ma au amio le tusitusi tala. E pei ona e amio a'i i le taaloga o le lakapi, tenisi, netipolo ma le soka, e te alu ma e taalo ai. 'A 'e le fiafia i le tala ua e tusia, numinumi, tia'i, ae toe tusi. 'A 'e faitau atu iai e te le fiafia lava iai, toe tusi. O le tusi tala e pei lava foi o le tagata lakapi, tenisi, netipolo ma le soka. A e fia lelei ai, to'aga e fai; to'aga e taalo ai, ona e faato'a lelei ai lea. E faapena foi le tusitala. To'aga e tusitusi tala. E aoga foi e faaleleia ai lau Gagana Samoa.

Na faapena ona tusia e le tama'ita'i o Margaret Mitchell le tusi ta'uta'ua i le lalolagi: o le **"Gone With the Wind"**; o se tasi o tusi aupito lapo'a ua tusia e se isi. O le tusi lea na fai ai le ata tifaga, o se ata na matua anoanoa'i tupe na maua ai. Sa faatinoina e nisi o alii ma tama'ita'i iloga i ata tifaga - o Clark Gable, Vivien

Leigh ma Olivia de Havilland. A o le tusi e uiga ese le tele. E 1037 ona itulau. Mo lou tou silafia, e faa-luasefulu ona tusia le tusi leni. A o le mataupu muamua, e faa-fitusefulu ona tusia, faato'a malie le loto o Margaret Mitchell. O le isi mea uiga ese, o le mataupu mulimuli o le tusi na muamua ona tusia e Margaret Mitchell. E le se mea faigofie lea i aso e lei iai ni komipiuta e faigofie ai ona tasui le tala. O le mea lea, 'a'ua e te malie gofie i le tama'i tala ua e tusia e na o le tasi pe lua pe tolu itulau. Toe tusi. Ma toe tusi. Ma toe tusi! Aemaise lava pe afai o e faaaogaina se komipiuta. 'A 'e le malie lava, numinumi, tia'i, ae toe tusi. Aua e te augata e tia'i. A ia e augofie e toe tusi. Manatua, e faa-fitusefulu ona tusia le mataupu muamua o le tala: **"Gone With the Wind"**.

O a'oga a faifeau na amata ai ona ou fiafia e faitau i nisi o tala o tusia i le Tusi Paia. Pei o le tala ia Iosefa ma ona uso; o le tala ia Ruta ma Naomi; o le tala ia Tavita ma Ionatana; ma Tavita ma Patisepa; o le mataupu e 23 o le Salamo, e ese le manaia o le tusiga o le mataupu lea; o le tala ia Iopu; o le tala i le Atalii Faamaumaumea; o tusi o Salamo, Faataoto ma Failauga ma Pese a Solomona, ma isi. Pei o tala ia ma tusi i le Tusi Paia na faaosofia ai lo'u fiafia i tala. Mulimuli ane ona ou iloa lea,

o le tala i le Atalii Faamaumaumea, o le tala puupuu aupito ta'uta'ua lea i le lalolagi.

O le a le mea ua filifilia ai e nisi o tusitala iloga o le lalolagi le tala: O le Atalii Faamaumaumea - *The Prodigal Son*, o le tala puupuu aupito sili ona manaia? O le tali, ona o le fiafia o tagata e faitau i mea o tutupu ai, i lesonea o maua mai ai; ma tagata o iai i le tala ma a latou vaega e faatino i le tala, poo "sikaili" - **style** - i le faatinoina o le tala, ma faigata na oo i nisi o ia tagata, na amata i le leaga, matua leaga lava, ae faai i le lelei, matua lelei lava. O le ute lava lea o se tala e te tusia, o le tali i le fesili: pe fiafia tagata e faitau ai. Is it interesting that the person will forget everything, and sit down and read the story? That's your goal! O le sini lena e te tulitulia. If it's not interesting, togi i le lapisi, ae toe tusi. The success of your story depends a lot on the answer to this question: Is it interesting? If the answer is no! Do it again!

**It is the supreme, and most important, ingredient in story writing. I'll say that again: It is the supreme, and most important, ingredient in story writing.** O le mea lea e aupito sili ona taua i le tagata e fia tusia ni tala: tusi ina ia fiafia le tagata e faitau lau tala, se'ia oo i le faaiuga, ma na iloa ai poo le a le iuga o le tala, pe faamalieina ai lagona, pe leai.

O tagata o loo iai i le tala i le Atalii Faamaumaumea, o le tamā onosa'i, alofa ma le fai fanau. O le atalii fia taa i le lalolagi ma fai lona saolotoga. O le atalii nofo i le aiga ma galue ai. O talavou tataa ma le soona fai o le olaga na oo ina paaga ma le Atalii Faamaumaumea. O le salamō ma le toe fia foi i le aiga. Ma le tamā faatalitali ma le alofa i le atalii pe toe foi atu afea. Ma le fiafia na fai ina ua toe foi atu le Atalii Faamaumaumea.

A tusi sau tala, ia lelei ni tagata e  
*faaauau itulau e 10*

# ITULAU MO TUPULAGA TALAVOU

## LAUGA 'A'AMI:

### Laugatogi Tauvaga Tusiga Tala - A'oga Mauululuga EFKS

*mai le itulau e 9*

iai, lelei ni a latou vaega e faatino i le tala, ia feteena'i foi nisi o vaega latou te faatinoina, e susua ai ma see le tala seia oo i lona iuga, ma tumau ai le fia faitau o le tagata. Fafau lau tala i ni faiga lelei - style - e logomalie i lagona o le tagata, pe a faitau iai: fiafia, faanoanoa, ita, inoino, ma isi lagona.

O le gagana e te faaaogaina, o le gagana faigofie ma le malamalama gofie ai tagata e toatele. E le aoga ona e faaaogaina le gagana faatulafale ma tele alagaupu e iai, ma fia faaali ai sou potu i alagaupu poo le aganuu, aua e le malamalama ai le toatele o tagata. Faaoga le gagana faigofie; le gagana taatele.

I tausaga e tele sa ou togiina ai tala o suega faapea ma tauvaga, ou te le togiina ni sese o le kalama, ae ou te faalogologo i lagona ou te maua mai le tala, ma lona faamatalaga ma le faatinoina e tagata o iai pe manaia, ma ou fiafia iai.

O le faifaleaitu e le popole pe sese lana gagana, ae talie ai lava tagata i ana tala e fai. O lana lea "style", (sikaili). Tatou te faalogo soo o faapea se isi, "E ese le sikaili o le teine." O le a le uiga? O aga a le teine; tifiga; faamaneene; o lana tautala ma lona leo malu, o ona mata e pulaalalo mai ma matamoe faaosooso. Ia e matauina "style", sikaili a tagata, aua o mea na e faasualieina le tala o fai.

Tusi faapena sau tala. Faaali mai uiga o tagata ia latou tala e fai

ma o latou uiga faaalua. Pei o se fafine nofotane 'ai'u'u ma le faitatala. E faapefea ona e faaali mai i taga a le fafine lona, o ia o se fafine 'ai'u'u ma faitatala? Poo se fafine talimalo ma agalelei. Faaali mai ma faamatala mai taga a le fafine e iloa ai ia uiga, poo nisi uiga. Ia e filifili upu fo'i, poo fea le upu e sili ona lelei ma malosi lona sao i le faaleleia o le tala. Tusi foi ni au amataga o lau tala, ma filifili ai se amataga e sili ona malosi mo lau tala, e faate'ite'i ai lagona o le tagata faitau.

Ma se faaiuga lelei e malie ai le lotu o le tagata. O pese tetele faa-Samoa, e faaoso lava i se fati e malosi ma ni upu e logolelei i le faalogo ma lagona. E pei o le pese: "Le Mavaega e Tavita ma Ionatana. Poo le pese, "Ou te le fia manatua, le afiafi o le Aso Gafua". E faalogo mai loa tagata i pese malolosi faapea ma le lelei o upu, fetai iai ma le fati, pei o le a le lolofi mai, ma logo faa-Tutuila ae tia'i isi mea. Ia faapea foi lau tala. Faaoso i ni lagona fiafia ma le faate'ite'i tagata.

O ata kaupoe isi faata'ita'iga lelei. O ia ata ua faia i luga o ni tala ua tusia lelei e faafiafia ai tagata. E amata le ata i le gaoiga e tagata leaga o le teine aulelei, o le uo a le tama e autu iai le ata, ona tatou faatalitali lea pe o le a faapefea ona toe lavea'i mai e le kaupoe lana teine, seia oo ina tau fana le kaupoe ma tagata leaga, sao mai ai le tama autu a ua

manu'anu'a i pulufana, ma sau lavea'i le teine, ma fusifusi, ma feakisi, ma feosoi i le la solofanua ma o. Ona tatou malilie ai lava lea ma fiafia ua feakisi le tama ma le teine, ma o i lo la aiga, ae taape fia momoe tatou mai le tifaga, ma le fia aai ma le mole o le manava.

A tusi ni au tala, filifili ni mea i lou lava siosiomaga. Amata ia te oe, se tala ia te oe ma lou olaga. O ou tei laiti, poo i latou e matutua ia oe. O ou matua, ma lou aiga. O le vaitafe ma vaipuna poo tufu i matafaga oneone e te iloa. O le vaituloto o Lanotoo. O tuliga a avii ma le manu o le tuli i le matafaga oneone. O taelega i le mulivai. E amata au tusitusiga mai mea o loo i lou siosiomaga ma faasolo atu ai i mea oi tua atu e te le malamalama lelei ai. E ta'ua e tusitala le faiga lea o le - "From the Known to the Unknown". Mai mea e te iloa, i mea e te le iloa.

O le tele o tala pupuu na ou tusia, o loo lolomiina i a'u tusi: "Maunu Mai Loimata o Apa'ula". O tala uma i le tusi lea na ou faasalalauina i a'u polokalame "O Oe Ma Lou Malo", ma la'u polokalame "O le Palolomu". Na mafua ona tuu faatasi a'u tala ma lolomi i tusi, ona o le fiafia iai o tagata faalogologo a o faasalalauina i le leitio 2AP.

Na maua so'u avanoa mai le Institute of Pacific Studies o le Iunivesite o le Pasefika i Saute i Fiti, na ou malaga ai e tuufaatasi le tusi, ma lolomi ai e le Iunivesite ae totogi e le Malo o Ausetalia. Ua faatolu ona lolomi la'u tusi lona ma faaoga i a'oga i Samoa nei.

O la'u tusi: "E Vaetuli le Fale Samoa a o le Faasinomaga", ua faalua ona lolomi. Na totogi foi e Ausetalia le lomiga o le tusi lea, ma le tusi "Turtlemen of Leusoalii", lea na toe lolomi foi ma faaigoa "Never to the Sina Again." E iai foi la'u tama'i tusi na faaigoaina: "Ou te le Teena le Faifeau Fo'efa'i".

O nisi o a'u tala na faatauina e  
*faaauau itulau e 11*

# ITULAU MO TUPULAGA TALAVOU

## LAUGA 'A'AMI:

### Laugatogi Tauvaga Tusiga Tala - A'oga Mauualuluga EFKS

*mai le itulau e 10*

le Ofisa o Aoga a Niu Sila, ma le Iunivesite o Aukilani, ma latou lomua ia latou tusi. O isi a'u tala o loo lomua i tusi a le Iunivesite o le Pasefika i Saute, ma le Iunivesite Aoa o Samoa.

O le tausaga e 1988, na maua mai ai so'u avanoa mai le Commonwealth Institute i Lonetona ou te malaga atu ai ou te auai i le Pacific Week, ma faitauina ai nisi o a'u tala na faaliliuina i le gagana Peretania. Na maua mai foi ni ou avanoa mai le Malo o Ausetalia, le Malo o Iapani, le Malo o Siamani, ma le Malo o Initia, ou te auai atu i ni faatasiga faaa'oga mo mataupu tau i le tusiga o tala, ma le faiga o tusi a'oga.

O le tausaga e 1963 na tofia ai a'u e fai ma faatonu, *editor*, o tusi a'oga i le Matagaluega o A'oga i Samoa nei, ma auina ai a'u mo le tausaga atoa i Niu Sila ou te faamasani i le tusia o tala ma le faiga o tusi a'oga mo Samoa nei, *editorial training*. O le taimi lena na ou tusia ai le tala i le "Mata Laumei a Leusoalii" (Turtlemen of Leusoalii), o le nuu na ou fanau ai.

Toetoe lava o a'u tala uma, e faavae lava i mea o loo i lo'u siosiomaga. O le siosiomaga ou te iloa ma ou masani ai. Ma o le mea lea e taua ai i soo se isi e fia tusia ni tala. E tataua ona e iloa lelei le mataupu o loo tusi ai lau tala. *Know your subject!* Pei ona e iloa lelei mea e uiga ia oe ma nai ou tei

ma ou matua.

O le tagata tusitala, e na te matauina lelei le uiga o mea i lona siosiomaga. Le uiga ma foliga o laau, ma manu, ma tagata ma a latou amio, tifica, aga, le tautala, le savali, le tafitifiti, le itaita gofie ma le palauvale. O le toaina ma le loomatua e faano'uno'u mai ma savavali i le maluu ma afisi a la toga. O le tala i le Teine i le Ofisa i Ueligitone, o le tala lea na ou tusia e uiga i se teine sa ma faigaluega i le Ofisa e Faia Tusi Aoga (*School Journals*), mo a'oga a Niu Sila, i le tausaga e 1963. O le a faai'atu ai la'u tautalaga i se vaega puupuu o le tala:

#### O le Teine i le Ofisa i Ueligitone

O le aulelei ia o le teine. Manaia ona fuaitino. Manaia lona lauulu. Manaia ona lima ma ona vae. Manaia ona tau'au. Manaia ona mata ma laumata mafitifiti. Manaia ona alafau. Manaia ona tulivae, e aliali mai pe a nofo i lalo ae mimigi le 'ofu i luga. E pa'e'e 'umi'umi. E se'ea le laulu. Ae mumu 'ula'ula ona laugutu i ana vali. O ona tautaliga e lautetele, ma lana 'ula, ua atili manaia ai lava lona ua. A o luga o lona tau'au, e nofonofu ai lana isumu ma feosofa'i solo i isi taimi.

O le faalavelave o le teine, e pei e fai a la taaloga ma lana isumu, ma faasi'umata mai ia te a'u. E tago atu i lana isumu i se isi taimi ua aumai, ua kisi iai, ma mumu

uma ai le gutu o le isumu. Na ou ita iai, ona, o le fai o ana mea ma tilotilo mai ia a'u, ma faaivi mai lona mata.

Na pei ou te te'i mai i sa'u miti ma la'u sioa i le teine ona o lona aulelei, ma ou manatua ai, si o'u to'alua ma si a ma fanau e to'a fa, o loo faatali mai i lo matou fale, se'i ou manava ona ou alu atu lea ma se matou mea'ai. Ona ou tu atu ai lea i luga ma ou fai atu i le teine, "E te iloa, ua ta le 'afa o le fa; ua manava galuega." A o le taimi lea na puna mai ai le isumu ua nofo i luga o lo'u tau'au, ma tilotilo i le teine, toe tilotilo mai ia au, pei e fai mai e 'a'ua ou te alu. Ona totolo ifo ai lea ua feosofa'i solo i lalo. Ona toe vevesi ai foi lea lo ma ofisa, ona ua fetamo'ea'i solo nei le isumu i totonu o le potu, ma fai ai a matou tuliga i lalo o laulau ma nofoa.

Na tu a'e le teine i luga, pei e 'ene e se aitu, ua savali mai, ma faapa'u mai lona ulu i luga o lo'u tau'au, ma ata 'e'e ai lava, ma oo ina manogi uma ai lo'u tau'au ma lo'u ofu, i ona u'u ma ana faamanogi.

O le taimi lea na tatala mai ai le faitoto'a e le loomatua e pule ia ma'ua, vaai mai i le mea o tupu. Ona fai mai lea, "Faapea a'u poo le a le mea lua te pisa ai, a o lena o lea e fai a tou tuliga ma le isumu."

Na toe tapuni mai le faitoto'a e le loomatua ma alu, ae fai mai le teine ma 'ata nene'a: "I have never laughed so much in my whole life! It's because of you, on your knees, chasing that little rat under the tables, and knocking over the furniture!" A o le isumu na mafua ai le vevesi, lea ua toe nofonofu mai foi i le tau'au o le teine, ma teuteu tino mai ai.

#### The Prodigal Son:

Someone asked Charles Dickens once what was the best short story in the English language, and his reply was: "The Prodigal Son".

# Aua Tou Te Lafo a Outou Penina i Luma o Puaa

*mai le itulau e 4*

A silasila lelei i le vaai faa-Feagaiga Tuai i mea e “paia”, e patino lava i le faatinoga o taulaga osi (sacrificial offerings), ina ia faia ma le faateete, ia paia foi lau taulaga osi, aua e paia le Alii, le Atua o Isaraelu. Ua taua i le Levitiko 8:31-32, le tineia i le afi o toega o aano poo tufaaga o se mamoe po’a sa osi ai le taulaga, aua o mea ua faapaiaina mo le Alii. Ae i le Levitiko 10:12-14, o loo faatonuina ai e le Atua le tagofia e Mose ma Arona, ma o la aiga, o mea ua saunia mo taulaga, aua e paia, mo le tagata ua faapaiaina (Mose, Arona ma isi). Peitai o aano o manu ua le mama, ma ua le talafeagai foi mo osiga taulaga, e ao lava ona tuu ese atu (Levitiko 7:23-25). Manatu o lea foi se taofi i le apoapoaga o loo i le Esoto 22:31, o loo tima’i ai le Atua ia Isaraelu, ‘ina ia fai outou ma tagata paia mo a’u, aua foi tou te aai i se manu na saeia i le vao; ia lafo lava lea i uli.’ (silasila i le Esoto 29:33; Levitiko 2:3; 22:6, 7, 10-16; Numera 18:8-19; Esera 2:63 ma le Neemia 7:65) i le faamuamua o iai i mea e paia e ao ona ofoina atu mo le Alii.

O mea ua faapaiaina (holy), e aofia ai foi ma nofoaga, poo isi mea ua faapaiaina, ma ua tuueseina mo le Alii (places, objects, and things). E le gata foi i lea, o fanua poo eleele (land), o le au ositaulaga (priests), faatasi ai ma taulaga osi, (sacrifices), o mea ia e ta’ua o mea ua paia aua ua vavaeseina faapitoa i latou e le Alii. Peitai, o “mea paia” (holy things), e masani ona faaaoga e ta’u ai aano o manu fasi, faapea ma fua o faaeleleaga ua tuueseina faapitoa mo taulaga osi i le malumalu, e pei ona muai taua i luga.

Peitai, e mafulu le manatu o le au suesue o le Feagaiga Fou, i lo latou talitonuga, o mea e “paia” ma “penina” lea e talanoa iai Iesu, o mea e patino tonu lava i le talitonuga faa-kerisiano, ma le feau o le Tala Lelei. O lona uiga, o mea e fitoitonu i le feau o le faaolataga ua faailoa mai e Iesu, o mea ia ua le tataua lava ona faasoa atu i

tagata ese, poo i latou foi o loo faataligatuli pea, ma soso mamao ese pea ma le moa o le ala, e ui ina o lea ua faalogo ma lagona aoaoga e faatatau i le malo o le Atua.

Ae o a ea nei mea? O le ala o le loto maulalo, fealofani ma le fe’oe’oea’i, o le alofa i le tuaoi ma le alofa i le Atua, o le loto faamagalalo, ma le tagata ofoina atoa mo le Alii, o nisi ia o aoaoga o le malo o le Atua, e paia, ma talafeagai lelei ma lo latou faatusaina i “penina”, aua e taugata, e anagata, e faapelepele foi iai le tagata ua talitonu, ma talia le oo mai o Iesu, o ia o le Alo o le Atua, e momoli mai le feau alofa o le Faaolataga mo tagata uma.

#### **4. O le molimau a Mataio (7:6), ma tusiga a le Didache (Teachings of the Twelve Apostles)**

E manatu le toatele o le au suesue o le Feagaiga Fou, o upu a Iesu pei ona faaaoga e Mataio, o loo sii tuusa’o mai lava i tusiga a le Didache. E faavae lea manatu o le au suesue, ona o loo taua i le Didache 9:5 upu o le faatonuga e faatatau i le Faamanatuga (Eucharist) e faapea: ‘Ia aua lava nei ‘ai pe inu se tasi e lei papatisoina i le suafa o le Alii (Lord) i le Famanatuga (Eucharist), aua o se e pa’i iai e aunoa ma le papatisoina, o ia lea ua fetalai mai iai le Alii e faapea, ‘Ia aua lava nei tuuina atu mea paia i uli’. O le faanaunauta’iga ina ia faatumauina lava le mamalu ma le paia o le sauniga o le Faamanatuga, e aunoa ma le faalavelaveina e tagata o e e le’i talia aloa’ia e tusa ma faatonuga a le Ekalesia.

Ae afai e tonu le manatu lea, o saunoaga a Iesu, o se mau e sii mai le Didache, aisea lava ua manatu ai Mataio, e faaaoga lea saunoaga tuusa’o i le vaega lenei o lana molimau? O iai ea ni faaifitauli faapea o loo tulai mai i le li’o o le au faatuatua i lea vai? Faamata o iai nisi o loo fai ma faavaatu’ia ai le galuega o le Tala Lelei i le silasila a le fai evagelia?

#### **5. Aisea la ua Vaoia ai e Iesu ona**

**lafo o mea “Paia”: ma “Penina” i Uli ma Puaa, nei latou soli ai i o latou vae, ma liliu mai, i le saeia ai outou?**

O lea la ua vavala mai le uiga o mea ‘paia’, ma ‘penina’, atoa ai ma upu ‘uli’, ma le ‘puaa’ e pei ona folasia i le molimau a Mataio. O le fesili la lea e fia tulituliloa, aisea la ua vaoia ai e Iesu ona faasoa atu mea paia ma penina ia i laou ua taua o tagata o nuu ese, ma i latou o loo faaululito pea i le uiga o lona oo mai i le lalolagi?

#### **O nai motuga’afa e fesoasoani i le fefaasoa’iina o manatu ma lagona e tusa o lenei taumafaiga:**

1. I le vaai lava ia a Mataio, e le gata mo lana Ekalesia i ia vaiata, ae faapea foi tatou, e matua moomia e le Atua o tatou tagata atoa, o le tino, mafaufau, ma le agaga ina ia ofoina atu atoa mo ia, ma lana galuega. E faasili lea nai lo e loto masalosalo, ma faalotolotua pe fia auai i le saofa’iga a le au faatuatua, ma talitonu i vavega tetele ua faia e le Atua mo le tagata, pe leai.

Manatu o le mafuaga lea e pei e foliga ai e ogaoga upu ua faaaoga e Iesu, ona o le “trust” ma “loyalty” lea e saili mai e le Atua, ina ia iloa i le tagata moni o le Alii.

Ae afai lava e maimau meaalofa foaifuaia mai a le Atua, lea e faasoa atu e le aifaigaluega ma i tatou uma, i se tagata e ola faa-foliga, e lotu nei ae mou ese a taeao, ua sala i le tuusao upu o le gagana a le Alii, o uli lava ma puaa i latou ia. O tagata e toe faasagasagamai, ma lepeti le filemu o se potopotoga, ma save’u le nofo lelei o se aulotu ma se mafutaga, e ala i tala fe’avea’i, o faamatalaga taufaaleaga e tupu ai le ita, ma le matau’a, ma le maua ai se nofo lelei o tagata lotu. I sauaga a le malo o Roma pei ona faamauina i tala faasolopito, o nisi o tagata Kerisiano, na toe molituina lava e le auuso, o e sa o latou mafuta ma faifai mea faatasi. Ae o ata vaaia ia o le isi foi saunoaga a Iesu, lea na ia fautuaina ai le au soo ma faapea, ‘ai se le talia outou, pe le faalogo ia outou upu, a outou o atu nai lea fale poo lea aai, ia outou tutu atu le eleele nai o outou vae; (Mataio 10:14)

2. E le o le finagalo o le Alii, ia faaigoa i ta’ua o ni uli poo ni puaa

*faaauau itulau e 13*

# Aua Tou Te Lafo a Outou Penina i Luma o Puaa

mai le itulau e 12

(tulou), poo tagata foi o lona sosaiete i ia vaiata, e leai. Ae ua na o ni ata faatusa o mafaufauga o le fai-evagelia, ae o ni lapata'iga foi e faatatau i le autau filifilia ua tulai mai nei e faaauau le galuega a le Alii. Mo i latou ia, ia ao pea lava ona manatu, ia tatou nei o tatou faamasino atu, ae ia taofi mau pea i le lagona, e le mafai lava ona faia le galuega, e aunoa ma le faalagolago i le Atua, o le na valaauina i ta'ua. E iai foi o tatou vaivaiga faale-tagata, e iai foi le mea e gata ai lo tatou malosi, e pei la o le mafai ona tatou teena e o loo naunau mai i le mafutaga ma le au faatuatua. Ae ia manatua lelei foi, o mea pa'ia, ma penina, e ao lava ona tatou faaeteete foi iai, i le soona faasalalauina, aua e le gata o mea e paia, ae ia manatua lelei foi, o i tatou ua valaauina e momoli le feau, ua maea ona faapaiaina, mo le galuega, i soo se tiute lava ua tofia iai.

3. I le vaai a nisi o le au suesue o le tusi lenei a Mataio, o loo tilotilo pea i latou, i le fesoota'iga o le faatonuga, o loo i le ff1, 'aua tou te faamasino atu, ina nei faamasinoina outou', ma upu tuu sa'o a Iesu, e pei ona taua i le ff7. E taofi le au suesue nei, o i tatou lava lea ua "toe faamasinoina" - o le uiga lea o le upu 'solia i vae', ma le 'saeia', e pei ona faaoga e Mataio. E faavae se lagona lea o le au suesue, pe a toe tomanatu i aooga a le Didache 9:5, lea e le o taua ai le vaega mulimuli o upu ua saunoa nei iai Iesu; 'nei latou soli ai i o latou vae, ma liliu mai, i le saeia ai outou?'

O lona uiga i le manatu o Mataio, e ui o loo taoto aooga a le Au Aposetolo e 12, ae o loo iai pea nisi o tagata o le uluai Ekalesia, o loo fai ma a latou vaisu le faavasega o tagata, ma faamasino poo ai e i totonu, ae o ai foi e i fafo o le li'o o le Tala Lelei - o le mea lenei e patino lava i le Atua.

## Manatu Faaiu

O nai manatu mulimuli e ta aofa'i ai lagona o se taumafaiga e faapea:

1. O lea lava ua manino le finagalo o

le Alii, e faatatau i le tatou nonofo, ma faavasega tagata, ma fai le faamasinoga e fua i la ta vaai faale-tagata. O lea ua toe faamanatu mai e Mataio, le le manuia o sea tulaga, pe afai o loo atagia i totonu o se aulotu, i le va feagai ai o le aufaigaluega faifeau ma ekalesia, ae faapea foi i le lotoifale o le aulotu lava latou, o totonu o faiganuu, o le faautauga o le Pulega, Matagaluega, ma soo se faalapotopotoga lava.

2. Afai lava e fesiligia e nisi o le au liulotu le moni o le tatou auai i totonu o ekalesia ma aulotu i ona gasologa masani, ona o le ola ua valaauina, o la latou lea faitalia, ae e le aveva lea ma ala e faavaivaia ai le tagata ua atoatoa lona talitonuga, e faia pea e le Atua

mea sili mo le tagata, e le tuulafoaiina foi ona tagata. I le ma lea, ia aua foi le fiu i le galuega tau logologo mo e ua fultua mai, e ui sa o tatou nutimea faatasi, ae ua toe faasagasaga mai i ni upu taufaifai, ma faamanu'alia ai finagalo o nisi.

3. O lo tatou taliaina o so tatou faatauvaa ma le le atoatoa, o le atoaga lea o le galuega ua filifilia iai i ta'ua e le Atua. O le ala lea e ao ai ona tatou ola faalagolago pea i le mana o le Agaga na te ta'ita'i, ma faatonu folau i le sa o le Tala Lelei, ae e le o le malosi, poo se potu, poo se loto foi o le faifeau poo lona faletua se ma'ema'e o se tiakono, ma soo se tagata lotu lava. E tofi le tagata ma ona vaivaiga, e lasi foi lu'itau eseese i totonu o aulotu, nuu ma ekalesia, o le afuaga lea o le tatau ai ona faamoemoe pea i le Atua, o ia na te aumai le malosi ma le tomai, tatou te galulue faatasi ai, e faatino le fe'au o le Tala Lelei, ina ia manuia, ae viia ai le Atua. Amene.

---

## Ua faafia ona Olegia pe Faalataina Oe e se Isi?

E malamalama lelei le tupu o Tavita i le tagata na te faalataina le isi tagata. Ina ua aveva Tavita ma tupu, na ia faasaoina uma le tupu na la sosoo o Saulo ma lona aiga atoa ona o lona alofa iai, a ua ia le fasiotia pe faaau'ua i nisi atunuu, e pei ona faamatalaina mai i le 2 Samuelu 9:

A o le auauna a Samuelu o Sipa, e le'i fiafia i le mea na fai e lona alii ma taumafai mulimuli ane ai e faaseseina Tavita.

Ma le taimi foi na auina ai e Tavita ni sui o lona malo e ave le faamafanafanaga i le tupu o le atunuu e tuaoi, ona ua maliu lona tama, ae na faamaasiasia e le tupu ia amapasa Isaraelu (2 Samuelu 10). Mulimuli ane, na fousa e Apisaloma le atalii o Tavita, ma Aitofele le faufautua faatuatuaina a Tavita, ia le tupu e pei ona faamauina i le 2 Samuelu 14-15.

Ma e toatele 'au ma uo a Tavita na fouvaleina o ia a o faaauau lea tetee a lona atalii o Apisaloma. Na matua faanoanoa ai lava Tavita i ia fouvalega aga'i ia te ia.

A na o tatou foi lea e fai iai nei mea, tatou te lagona lava foi le faanoanoa ma le mafatia. E ono le toe faatuatuaina ai se isi, tusa lava pe o le a lou faatuatuaina o lea tagata. E te ono fia tau ma sui foi i ia tagata ona o mea ua latou faia mai ia te oe.

Peitai fai mai le tusi: "O lenei, a matelaina le ua ita mai ia te oe, fafaga ia te ia; a fia inu ia, avatu ia te ia e inu ai; aua o le amio faapea e faafaupu'e ai malala ola i luga i lona ulu. Aua le faato'ilaloina oe i le leaga, a ia e faato'ilaloina le leaga i le lelei." - Roma 12:20,21.

O nei upu e le faigofie ona mulimuli ai, peitai e aumai e le Atua le malosi e mafai ai ona tatou faia.

# O E UA FAI'ILAGI LE FOLAUGA

## Pitone Faauiga Latu Taalo Toso 29 Iulai 1930-19 Iulai 2017

“Ia manuia outou ma a outou fanau.” - O le faamanuia masani lava lea a Pitone Faauiga Latu Taalo Toso, mai lava i lona malosi, ae faato'a le toe lagona lava ina ua ia le mafai se tala.

O le afafine o le faifeau LMS o Ikapoti Amosa Tumanuvao mai Lefagaoalii Safune ma lona faletua o Matagi Fata o Afega. Sa galulue i le aulotu LMS i Sataua. Na faaipoipo atu Pitone ia Latu Taalo Toso o Vaiafai Iva ma e to'a 16 le la fanau ma le toatele o fanau ma fanau a la fanau.

Na usufono Latu Taalo Toso i le 23 Me 1992, ona tausi toatasi ai lava lea e lenei tina lana fanau toatele aemaise ai o le tautua i le aulotu EFKS i Iva. O lima faamanuiaina ma lana tatalo faifai pea, ua manuia ai le fanau ma ua sailimalo i atunuu i fafo pei o Amerika, Ausetalia ma Aotearoa. O le ala lea o le tuua o le aiga i Vaiafai, Iva, ae malaga mai ma nofomau i Aotearoa i le 2011. Na amata mai ai lava i lea tausaga ona galue faamatafale aemaise o se matua tausi o lenei aulotu EFKS i Mangere Bridge seia oo ina amia e le Atua i le aso 19/7/2017 i le maota gasegase i Middlemore.

O se tina e tautua matalilo aua e leai sona leo i tonu fai a lenei aulotu ae e galue malosi i soo se mea e fai a le aulotu. O lana lava lea faamuamua o ana mea faale-lotu. E na na ma faapolopolo iai ana seleni ma soo se mea lelei e na te maua. O lana filosofia, 'e le toe maua le taimi.' O le uiga o le tala, a ua fai loa se mea, tuu atoa iai lelei ae aua le faataga faia.

Ua faapena le fai mea a lenei tina i totonu o lona aiga ma le aulotu.

O lona lotu e faamavae atu ai i lana aulotu EFKS i Mangere Bridge na faia e le Pulega Maugakiekie i le falemaluu o Ligaliga 21/7/17 i le 6pm. O le Toeaina o le Pulega a Maugakiekie Pouniu Faamausili FT, sa taitai. O Auvaa Eneliko FS sa faitauina le Tusi Paia ma tatalo a o Perekina Waterhouse AM sa faia le lauga.

Na molimau laeli Taalo Lualua, ma A'oa'o Taalo Leituala e fai ma sui o le fanau, a o a'u sa molimau mo le aulotu.

O le Aso Sa 23/7/17 na malaga atu ai mo Samoa ma tuuvaa atu ai loa i

## Leaitutulia Oloapu Tuga Misi 25 Oketopa 1943-3 Aperila 2017

O Leaitutulia, poo Oloapu Misi e pei ona silafia ai, o le tiakono sa galulue ma lona faletua ia Meleone i le Aulotu EFKS, Fusi Safotulafai. O ona matua o Leaitutulia Misi ma Masae Manogiamanu o Manono, a o ona matua fai o Feetau ma Tufue Atatagi. Na avea le tuumalo o le tina ia Tufue o se tasi o matua tausi o lenei Aulotu i le aso 25 Oketopa, 2013 ua matou masani ai ma Leaitutulia ma Meleone ma si a la fanau seia oo ina faauluina le latou matafale i le aso 16/2/2014. Na maua le tusi faamaonia o lona tofi tiakono mai ia Mafi Faamoe (FS) o le EFKS i Fusi ma talia aloa'ia ai loa e avea ma tiakono o lenei Pulega a Maugakiekie i le aso 14/6/2014. E tusa ai ma le tusi na tuuina mai, sa faatiakonoina i le aso 29/7/1985. O se tama e gasegase tele ma na amata mai le aso 6/7/2014 ona ou usu i taeao o Aso Sa muamua o masina taitasi e ave le faamanatuga

lona aiga i Vaiafai, Iva, i le aso na sosoo ai. O ona toe sauniga 25/7/17 na faia lava i le malumalu EFKS i Iva, na taitaiina e Tonu Mauafu FS, o Pouniu Faamausili FT na lauga. O Lilaki Taalo Faauiga na molimau e fai ma sui o le fanau; o Tofilau Latu Lulu sa molimau e fai ma sui o le aiga, o Tone Leitua FS ma Tonu Mauafu FS sa molimau e tusa o lona soifua faaleagaga. Ona faaii ai lea i le sauniga faaii i luga o lona tuugamau i lona aiga i Vaiafai i Iva na taitaiina e Pouniu Faamausili FT.

Ua fuli mai lona tua ae ua fo'i atu ma le malie i faamanuiaga a le Atua ua manuia ai lona aiga ma lana fanau.

*“Le pele e, ia e manuia i mea uma, ma ia e malolo, faapei ona manuia o lou agaga.”*

Tone Leituala FS,  
EFKS Mangere Bridge,  
Pulega Maugakiekie,  
Matagaluega Aukilani

mo le Tiakono e pei ona masani ai mo matua tausi uma. A o le faamanatuga o le Aso Sa 2/4/2017 na faia i luga o lona moega lana faamanatuga ona ua ia le mafai lava ona gaoioi. Talofa e, o le ma toe feiloaiga lea ma le auaua, o luga o lona moega aua na fuli mai lona tua i le afiafi o le Aso Gafua 3/4/2017.

Na faia lona Family Service i lo matou falelotu le Nga Tapuwae Hall i le 6pm 9/3/2017. O a'u, Tone Leituala (FS) sa taitai, o Tuiloma Rocky (AF) sa faia le tatalo a o Leala Ioane (AF) sa faitauina le Tusi Paia, ma o le lotu foi lea na faamavae atu ai lana Aulotu EFKS Mangere Bridge i le afioga i le tiakono ona momoli atu ai lea o lona sa mo Samoa. Na taunuu i Samoa i le aso 11/3/2017 ma molimoli atu ai loa i Savaii i lona aiga ma le Aulotu EFKS, Fusi Safotulafai.

O ona toe sauniga na faia lava i le malumalu o le EFKS, Fusi Safotulafai, o le taitai o Mafi Faamoe (FS) a o a'u, Tone Leituala (FS) sa faia le lauga. Ona faaii ai lea o lona sauniga i luga o lona oliolisaga tumau i lona aiga i Fusi sa ou taitaina.

*faaauau itulau e 15*

# O E UA FAI'LAGI LE FOLAUGA

## Leaitutulia Oloapu Tuga Misi

mai le itulau 14

Ia faamaise le Atua i le tina ia Meleone ma si ana fanau ma le aiga potopoto. Ia tafimala lau malaga Leaitutulia Oloapu Misi, ma ia maua

sou nofoaga tumau i le malo o le Atua. *“A o a’u, aua nei o’u mitamita i se mea e tasi tau lava o le satauro o Keriso.”*

Tone Leituala (FS)  
EFKS Mangere Bridge  
Pulega Maugakiekie  
Matagaluega Aukilani

## Moevaolemauasamoa Talamaivao

2 Aokuso 1929-3 Oketopa 2016

O le tina manumalo malolo faaeaina. Ua afe moe le folauga a lenei toa o le Tala Lelei. O le tina manumalo malolo sa avea ma faletua o le Toeaina Faatonu o Tavita Talamaivao. Na maliu filemu o ia i le Maota Gasegase i Palmerston North i aso3 Oketopa 2016. Na soifua mai i le aso 2 Aokuso 1929 i Malua i ona matua o Faalaituie ma Faasasalu Leauga Tuilaepa.

Sa avea ma faletua o le Faifeau Toeaina Faatonu o le Matagaluega a Niu Sila i Saute mo ni tausaga e

tele. O se tina lototele ma le finafinau mo le faatuputeleina o le Tala Lelei o le Faaolataga a Iesu Keriso ma ua iloga ana galuega i le Ekalesia i Niu Sila ma Samoa. O se tina fai mea lelei, ma fiafia e fai mea sili mo le galuega pa’ia a le Atua. E loto alofa i le aufaigaluega a le Atua, ma faufautua lelei aua le manuia o le Ekalesia e pele ia te ia.

O lona toe sauniga sa ta’ita’i le Susuga i le Toeaina Faatonu Aufaga Faafia. Faitau Tusi Paia Rev. Elekana Tuialii, tatalo Rev Faafetai Milo ae molimau a’u nei.

Na faaiu le sauniga i lona oliolisaga tumau i Kelvin Grove Cemetery, Palmerston North.

Periti Oka Fau’olo F.S.

## Afoa Dr. Semo Koro

26 Setema 1933-17 Fepuari 2017

O le Susuga i le Tiakono ua 45 tausaga o tautua faafoma’i i Samoa, Niue ma Tokelau faapea le Ekalesia i Samoa.

Sa avea ma tiakono i le EFKS i Lotopa ma matou galulue ai i le tausaga 2009 ina ua malolo. O se tama agamalu ma le loto maulalo. E fiafia ma to’aga i sauniga uma a le Ekalesia. Ua iloga lona soifua tatalo ma le faamoemoe i lona Atua a o feagai ai o ia i tiute faafoma’i.

Na soifua mai i Atafu, Tokelau i le aso 26 Setema 1933 ae na maliu filemu i lona maota i le aso 17 Fepuari 2017.

O lona toe sauniga o a’u sa ta’ita’i. O Rev. Nevin Atoa sa faitau Tusi Paia. Na matagofie le molimau a lona faletua o Tanetau Semo Koro faapea Rev. Penaia Koro le sui o le fanau ona faai’u lea e a’u. sa tatalo Rev. Kerisimasi Sala’o, ae lauga le Faifeau Toeaina o Palemia Tauiliili. Sa faaiu le sauniga i lona nofoaga tumau i Kelvin Grove Cemetery, Palmerston North.

“Ina alu ia ina ai i lau mea e ai

ma le olioli ina inu foi ia i lau uaina ma le loto fiafia aua o loo fiafia nei le Atua i au galuega. - Failauga 9:7.

Kua tautai ete Tautai Hilitau toe tiu, le tama nae toka ai ia Nuku, te tama, nae tonu ai ia kaiga, te tamana e pele i fanau.

Pereti Oka Fauolo F.S.

## Leolaga Tuisafia

10 Iulai 1948-3 Oketopa 2016

Talofa e ua amia e le Atua se tasi o poutu toa o le Ekalesia. O le Afioga i le tiakono o Leolaga Tuisafia. O se auauna filiga ma le tutumau faamaoni i lona tofi.

Sa avea ma ta’ita’ipese mo ni tausaga se tele. O lona fiafiaga lea e pese leotele ma pese fiafia i viiga o le Atua. E lotomau ma fiafia e faitaulaga aua e loloto lona faatuatua. E tausi faifeau ma toaga i sauniga uma a le Ekalesia aua e pele ia te ia le Ekalesia a lona Alii o Iesu Keriso. Ua faamalo le tautua Tuisafia, se ua maualuga lava le viiga o le Atua i lou soifua auauna.

Na soifua mai o ia i le aso 10 Iulai 1948. Na maliu filemu o ia i se gasegase faafuasei aso 3 Oketopa 2016. O lona toe sauniga sa ta’ita’i ai le Susuga i le Toeaina o Aufaga Faafia. Molimau si ona faletua o Moria Tuisafia ma a’u nei. Sa tatalo Rev. Meki Lauvi, ae lauga Rev. Elekana Tuialii. Sa faaiu le sauniga i lona oliolisaga tumau i Kelvin Grove 118 James Line Cemetery, Palmerston North.

“Na foa’iina mai e le Alii ua aveeseina e le Alii ia faamanuina le suafa o le Alii.”

Periti Oka Fau’olo F.S.

## Truth - Ever True

Since truth is always true  
And only true can be  
Keep me, O Lord, as true to truth  
As truth is true to Thee.

by T. Baird



# O E UA FAI'ILAGI LE FOLAUGA




**Pitone Faauga Latu  
Taalo Toso**




**Leaitutulia Oloapu  
Tuga Misi**



**Moevaolemauasamoa  
Talamaivao**



**Afoa Dr. Semo Koro**




**Pepe Sialei Peteru Seiuli**  
17 Iuni 1957-25 Iuni 2017

O le faletua o le faifeau. Na soifua mai i le aso 17 Iuni 1957, ae maliu i le aso 25 Iuni 2017; ua 60 ai tausaga o lona soifua.

O matua o Mauafu Tafao Tuitasi le tama, ma Sialei Fogatu le tina. Na faaipoipo ia Peteru Seiuli i le aso 22 Tesema 1979. E to'afitu le la fanau, ae to'avalu le la fanau fai. E to'avalu foi fanau a le la fanau. O Pepe o lona alaafaga o Sapapalii.

Na ulufale Peteru ma Pepe i le Kolisi Faafaifeau i Malua i le tausaga e 1992, ae faaiuina lo la taumafai i le 1995. Sa valaauina e le Ekalesia i Vaoala e fai ma o latou faifeau i le tausaga e 1997 i le 2003.

Na matou mafuta ma Peteru ma



**Leolaga Tuisafia**

Pepe ina ua malolo mai i aiga, ma avea ai loa i la'ua ma faifeau nofo aiga i le EFKS i Alafua i le tausaga e 2003 e oo mai i le 2017, ina ua amia le faletua. O loo matou lolotu pea ma le faifeau ma le nofo a alo.

Sa avea Pepe ma faia'oga i le Malo i le 1977 i le 1983. Faia'oga i a'oga a le Ekalesia, Tuasivi ma Maluafou mo tausaga e 23. Fai ma faletua tausinuu i Vaoala mo le ono tausaga.

O Pepe o le tina e ese le faamaopopo mea, toe fesoasoani mai ia ma'ua i le galuega. E fautua lelei, ma taulamua i mea lelei i faalapotopotoga taitasi, Mafutaga a Tina, Aufaipese, Autalavou, ma le A'oga Aso Sa. E mulimuli atu sa'u

tala, a ua uma ona faatonu ma otegia e Pepe le tagata. O le tina e tautala sa'o, a manatu i se mea e fai, e fesili mai muamua pe ma te loto iai, pe leai.

O lona sauniga faaleaiga na faia i le malumalu EFKS i Alafua, i le Aso Lua 4 Iulai 2017, i le itula e 4 i le afiafi. Taitai ai le Susuga ia Tonu Peleseuma F.S., ma fesoasoani iai faifeau o le aiga o Pepe.

O lona toe sauniga o le Aso Lulu 5 Iulai 2017 i le 10am i le malumalu EFKS i Alafua. Sa valaaulia le Pulega. O a'u sa ta'ita'i, Kirisimasi Salaa FS sa faaulufale le vaa o le tina. O Misipalauni Faatau FS sa ta'ita'i i talosaga, Posala Tiotio FS faitauina le Tusi Paia. O le Susuga i le Toeaina ia Faauga Mata'utia FT sa lauga. O a'u na molimau ma faaopopo, ona faaiu ai lea i lona oliolisaga tumau i lona aiga i Vaitele Fou.

"Amuia lea auauna, e maua mai e lona Matai o loo faapea ona fai."

Tofa Pepe, manuia lau malaga.  
Tavita Anesone FT.